

Ha'u nia respetus ba:

- Sua Exelénsia, Vise Primeiru Ministru no Ministru Planu no Ordenamentu, José Maria dos Reis
- Sua Exelénsia, Ministra Negósius Estranjeirus no Kooperasaun, Adaljiza Magno

Boatarde,

Loron ohin loron di'ak ida. Loron di'ak ida ba Timor-Leste no Estados Unidos Amérika, tanba loron ne'e marka inísiu husi Reabilitasaun Konjunta ba Aeródromu Baucau, projetu ida ne'ebé Governu Timor-Leste hakarak atu dezenvolve iha tinan barak ona no ohin loron ida-ne'e finalmente realiza dunik. Ne'e mós marka inísiu husi diskusaun adisionál-sira entre Embaixada no Governu kona-ba apoiu potenciál ba dezenvolvimentu Timor-Leste nia setór aviasaun sivíl.

Memorandu Entendimentu rua ne'ebé ita atu asina ne'e refleta Estados Unidos nia kompromisu hodi apoia Timor-Leste tantu iha Timor ninia área Seguransa Nasionál rasik no dezenvolvimentu ekonómiku. Estados Unidos sente orgullu halo parseria ho ita-boot sira relasiona ho projetu importante hirak ne'e, ne'ebé, tuir ha'u haree, signifika amizade mútua ita-nia nasaun rua nian.

Estados Unidos Amérika no Timor-Leste iha relasaun no akordu seguransa ne'ebé kleur ona. Ami sente haksolok apoia Governu Timor-Leste nia esforsu-sira atu kria no dezenvolve ho profesionál Komponente Aéreo F-FDTL nian, ne'ebé sei kontribui maka'as ba protesau soberania Timor-Leste nian, sei hasa'e konxiénsia iha domínio marítimu, no ajuda kontribui ba prosperidade ekonómika.

Ha'u kontente katak Governu Estados Unidos aloka tiha ona dólar amerikanu miliun sanulu pontu nein (\$10.6 miliaun) ba dezenvolvimentu Komponente Aérea F-FDTL nian, no oferese obra kontrusaun eskala-kiik ba Aeródromu Baucau. Estados Unidos mós pronto atu fornese apoiu adisionál no ha'u hatoo ona oferta ne'e ba Governu.

Se ita-boot sira haree ba ita-nia sorin-sorin, ita-boot sira sei haree fotografias husi ekipamentu hirak ne'ebé ami atu fornese – buat sira ne'e hotu sei sai Timor-Leste nian. Ne'e inklui Aviaun Vizilánsia Cessna 206 Halo iha Amérika ne'ebé sei permite atu monitoriza Timor-Leste nia área marítima – purezemplu, hodi detekta peska ilegal – no sei ajuda mós iha auxiliu ba dizastre. Ami espera sei lori Aviaun

ne'e mai iha ne'e iha tinan ne'e nia rohan. Ami mós sei fornese kamiaun kombustivel ida, bombeiru ida, kamiaun Ford-450 rua, veikulu hamoos pista ida, forklifts, no veikulu apoiu no ekipamentu sira seluk uza ba iha aeroportu

Ekipa konjunta enjeñeiru husi militar Estadus Unidus no F-FDTL sei konstrui mós armazen ida ba ekipamentu hirak ne'e iha Aeródromu Baucau no rekonstrui vedasaun perímetru seguransa haleu Aeródromu ne'e.

Hanesan ita-boot sira bele haree, maske projetu ne'e atu dezenvolve kapasidade F-FDTL nian, maibé iha mós oportunidade hodi fortalese setór aviasaun sivil. Pakote apoiu ida-ne'e benefisia mós poténsia utilizaun komersiál ba Aeródromu Baucau, ne'ebé ha'u rona husi funcionáriu-sira governu nian no comunidade lokal-sira iha Baucau katak ne'e ida-ne'e dunik maka sira hakarak tebes. Baucau iha poténsia hodi sai ligasaun importante entre Timor-Leste no rejiaun ida-ne'e.

Tan ne'e, hau onradu tebes asina mós Memorandu Entendimentu ida hodi manifesta ami-nia intensaun atu explora oportunidade-sira hodi kontribui ba desenvolvimentu setór aviasaun sivil Timor-Leste nian. Aviasaun sivil iha poténsia promissora boot tebes iha Timor-Leste. Ha'u hein ba oin halo diskusaun-sira ho Governu kona-ba oinsá Estadus Unidus bele apoia diversifikasaun no vibransia ekonomia Timor-Leste nian.

Atu taka, ha'u hakarak hatoo obrigadu wain ba Vise Primeiru-Ministru dos Reis ba ita-boot nia lideransa iha projetu konjuntu ida-ne'e. Ha'u mós hakarak agradese Primeiru-Ministru ba ninia envolvimentu direta no istória naruk husi ninia apoiu ba renovasaun Aeródromu Baucau. Nune'e mós, ha'u apresia tebes ba Ministra Negósius Estranjeirus no Kooperasaun ne'ebé ohin hola parte iha okaziaun ksolok ida-ne'e.